

Vrijednim radom i suradnjom proizvođača i općinskih službi do impresivnih 7 miliona litara mlijeka godišnje na području Sanskog Mosta

Sanski Most, 10.10.2024.

U 2023. godini kroz READP su za 31 proizvođača mlijeka u općini Sanski Most nabavljene visokoproduktivne steone junice. Ova važna projektna pomoć je značajan doprinos malim proizvođačima koji su ciljna populacija projekta u poboljšanju njihovog materijalnog statusa i



Istovar junica. Foto: sanskimost.gov.ba

izlasku iz kategorije siromašnih. Junice su nabavljene iz Njemačke, u ukupnoj vrijednosti od 184.977,00 KM, zahvaljujući sufinanciranju od strane Ureda za koordinaciju projekata – PCU i

Općine Sanski Most, koji su izdvojili 69.800,00 KM, odnosno 69.999,86 KM, dok su ostatak investicije osigurali poljoprivrednici u iznosu od 45.177,14 KM.



Junice u karanteni prije isporuke proizvođačima. Foto: Husejin Selimović

Proizvodnja mlijeka u Sanskom Mostu je vrlo važna za brojne poljoprivrednike, koji su vrijednim radom postigli impresivnu godišnju količinu od više od 7 miliona litara. Ova količina je rezultat prvenstveno njihovog rada, ali i općinskih službi i SLUP-a, čiji su članovi.

Husejin Selimović je predsjednik Saveza lokalnih udruženja poljoprivrednih proizvođača (SLUP) iz Sanskog Mosta. Prema njegovim riječima, Savez je registriran u 2006. godini i kroz period od skoro dvije decenije prošao je kroz sve transformacije koje su pratile poljoprivredu ovog kraja.

Savez ima 281 člana, od čega su oko jedna trećina žene a otprilike jednu trećinu članstva čine mladi proizvođači. Od ukupnog broja članova Saveza, 65 njih je registriralo obrt.

SLUP je prema Husejinovim riječima, vrlo aktivan kroz sve godine postojanja. Zajedničkim radom sa proizvođačima, uspjeli su u naporima da mljekarska proizvodnja bude uvrštena u općinske i kantonalne poticaje, što je situacija koja uveliko olakšava rad poljoprivrednicima. Osim ovoga, SLUP lobira i bori se za svoje članstvo, također uspješno aplicira i implementira brojne projekte koje su financirale neke od najvećih organizacija koje operiraju na teritoriju BiH, poput USAID,

UNDP, EU komisije i drugih. Rezultat svega toga je poboljšan položaj i ekonomska situacija za proizvođače Sanskog Mosta, a sve je ovo moguće zahvaljujući znanju i iskustvu Husejina i njegovih kolega, o čemu svjedoče brojna priznanja i certifikati u Husejinovom uredu.



Husejin Selimović, predsjednik SLUP-a. Foto: PCU/F. Belko

U nabavci junica je značajnu ulogu imala i firma „Čapljanka“, kao lider u proizvodnji mlijeka u Sanskom Mostu. Obzirom na značaj ove proizvodnje u Općini, ulogu SLUP-a, kao i inicijativu firme „Čapljanka“, kroz READP je za ovo udruženje osiguran kapital kojim su nabavljena 3 laktofriza, što će značajno povećati kvalitetu i sigurnost ove proizvodnje. Veći dio nabavke je realiziran iz kredita IFAD-a, dok su preostali dio platili proizvođači udruženi u Savez.

Laktofrizi se već uveliko koriste, na zadovoljstvo i korist proizvođača, a raspoređeni su na 3 lokacije, kod proizvođača s najvećom proizvodnjom, pri čemu drugi, manji mljekari svoje mlijeko donose na najbližu lokaciju kojoj gravitiraju.

Osim ovog značajnog koraka u unapređenju proizvodnje, Husejin kaže kako ima i problema, za koje vjeruje da se mogu riješiti kroz rad veterinaru, poput nabavke kvalitetnijeg materijala za osjemenjivanje ili unificiranjem cijena uzorkovanja krvi za obnavljanje štalskog kartona za vlasnike mliječnih krava. Štalski karton je važan dokument koji proizvođači moraju imati da bi mogli dobiti poticaje.

Više informacija o nabavci junica dostupno je na sljedećim linkovima:

<https://sanartv.ba/hronika-sana-21-6-2023/>

<https://www.sanskimost.gov.ba/index.php/obavijesti/835-ukupno-31-junica-pasmine-simental-isporucena-sanskim-poljoprivrednicima>

<https://sanartv.ba/hronika-sana-15-7-2023/>